

Parare Domino Plebem Perfectam

A lokisetse Morena Sechaba se phethehileng (Luka 1,17)

# Moeletsi oa Basotho

[www.moeletsiobasotho.co.ls](http://www.moeletsiobasotho.co.ls)

Ba hlaola  
ba furallane



5

E tsota liqeto  
tsa LNDC

7

O laela  
LNDC



8



## BAITHUTI LEFANG NMDS



2

[www.moeletsiobasotho.co.ls](http://www.moeletsiobasotho.co.ls)



KETEKELO EA LILEMO TSE MAKHOLO A  
MABELI SECHABA SA BASOTHO SE THEILOE

+266 28 350 466/  
+266 6260 0983 WhatsApp  
[newsroom@moeletsiobasotho.co.ls](mailto:newsroom@moeletsiobasotho.co.ls)

#PARARE DOMINO PLEBEM PERFECTAM

# MOELETSI

## Hopolang ba tlang

Banna ba Basotho ba holisitsoe ka maele a reng "monna ke nku ha lle" ao matsatsing ana a ba etsang litopo tse tsamaeang. Lefatše le tsoile letšolo ho loantša tlhekefetso ea basali le bana eo ba e etsoang ke banna, e leng taba e ntle haholo. Empa ho shebahala ho lebetsoe tlhekefetso eo banna ba e etsoang, 'me ka lebaka la ho sireletsoa haholo basali ba qetella ba iketsetsa ka ho rata 'me ba hleketsetsa banna haholo maikutlong. Ka lebaka la maele ane banna ba koenyeletsa mathe le mali hobane ba tšaba hore ho tla thoe ba selehe, ebe ba ba le khatello ea maikutlo. Matsatsing ana palo ea banna ba tšeroeng ke lefu la ho shoa lehlakore (stroke) e phahame haholo. Ho ile ha tuma hape hore banna ha ba tlaheha tlhekefetso sepoleseng ba tleptjoa litšeho, leha ho le joalo lintho li fetohile hobane sepolesa se se e-na le mokhatlo kahara sona o thusang banna mabapi le litaba tse kang tsona tsena. Ka hona bontate tlahehang tlhekefetso eo le e etsetsoang ho qoba ho inkela molao matsohong.

Mokha oa Liketso le Bophethahatsi (BAP) o shebahala o e-na le likhohlano mabapi le taba eo e leng khale joale o e seka-seka, ea Mongoli e Moholo oa Lekala la Matla le eteletsoeng pele ke Moetapele oa Mokha. BAP e ipileletsa ho Tona-Kholo ho leleka mongoli enoa mosebetsing hobane o sitisa letona ho etsa mosebetsi, etsoe motho ea tšoanang a lelekiloe kahara mokha. Tona-Kholo o nkile leeto a se ntse a tseba litaba tsena empa a se ke a li natsa, ka hona o se a tla utloa liqeto tsa Komiti e Kholo ea Mafube.

Komiti ea Paramente e alositseng Tšebeliso ea Lichelete tsa Sechaba (PAC) bekeng ena e bile maphathe-phathe ho tšohla litaba tse ngata tse batlang li makatsa. Kampani ea Loti Brick e ile ea qetella e koetsoe hobane e hloka chelete e lefang basebetsi kapa hona ho fana ka thepa ho bareki ba seng ba lefile. Baokameli ba hlalosa ha Kampani ea Hippo Transport e ile ea ikhula thekong ea Loti Brick eaba ba sheba ea Lephema Executive. Se makatsang komiti ke hore bookameli bo hlalosa ha Hippo Transport e ne e reka Loti Brick ka M29Millione empa bo sa bolele hore na Lephema Executive eona e behile chelete e kae. Litho tsa komiti li ile tsa ba ntsoe-leng hore Koporasi ea Ntlafatso ea Moruo oa Lesotho (LNDC) e koale hobane e hlotsoe ke ho etsa mosebetsi oa eona; oa ho lisa kampani ena le ho etsa mosebetsi e meng e e amang.

Ka lehlakoreng le leng Ramolao oa LNDC o tekile bopaki kapel'a PAC hore Letona la Lekala la Likhoebos le ile la susumetsa hore koporasi e fe melata chelete, e leng ho ka thoko ho molao, 'me joale melata eo e se e sitoa ho lefa chelete e joalo. Moetapele oa Mokha oa Sechaba sa Basotho o re hang kamor'a hore LNDC e fane ka bopaki bo hlakileng Setsi sa Toantšo ea Bobolu le Bomenemene (DCEO) 'moho le sepolesa se ne se lokela hore se nketse bohle ba amehang likhato tsa molao.

Letona la Lichelete le Ntšetsopele ea Meralo le ipileletse ho baithuti ba ileng ba thusoa ke Setsi sa Pokello ea Lihlapiso (NMDS) ho lefa setsi ha ba se ba fumane mosebetsi. O re sena se tla thusa hore mafutsana a fumane lithuso ho kena sekolo. Ntlha e 'ngoe ea bohlokoa eo a e ammeng ke hore ba tlo ba le 'moka moo ba tlo hlahloba thuto e bonahalang e nyotobetse. Ba tla sheba haholo manane-thuto a tšehetsang lithuto tsa mahlale, boqapi le mosebetsi oa matsoho, e le hore baithuti ba tsebe ho ithehela mosebetsi.

# Baithuti lefang NMDS

## Nthabeleng Seithleko

Letona la Lichelete le Meralo Dr. Retšelisitsoe Matlanyane, o re Lekala la habo le tšeroe matsoho ke nyeoe e ileng ea hlahleloa ke baiketi ba neng ba iketela ho tla bokella mekitlane ea baithuti ba kolotang lihlapiso. O boletse tsena, tulong ea Ntlo ea Mahosana, ka la 20 Pulungoana monongoaha.

O re nyeoe eo e ntse e le matsohong a Setsi sa Thibelo ea Bobolu le Bomenemene (DCEO), 'me hang ha e felile ba tla bona hore ba kopana le bahoebi ba ikemetseng, le bohle ho etsa tumellano hore basebetsi ba lefe mekitlane ea bona. O re taba ena o ne a ikemiselitse ho e kenya tšebetsong h'a kena ofising hobane lichelete tse ngata li matsohong a baithuti.

A supa hore baithuti ha ba le lipotsong tsa mosebetsi ba tla lokela ho botsoa ka chelete ena, ba fane ka mabaka ao ka ona ba neng ba sitoa ho lefa, kaha hoo ho tla thusa hore baithuti ba itšuthumetse.



Dr. Matlanyane o supile hore ba se ba na le leano le tla tšohloa haufinyane ho bona hore litaba tsena li'a lokisoa. Ho feta mona o itse batsoali ba etsa boitlamo ho se behoang paneng e leng phoso kaha batho ba nka monyetla ka tumellano e tsebahalang hore ha moithuti a sitoa ho lefa mekitlane, motsoali o nka boikarabelo.

A re ho latela hore na Setsi sa Pokello ea Lihlapiso (NMDS) se ahiloe joang, ha se boemong ba ho bokella litsiane ka lebaka leo ba lokela ho matlafatsa ofisi tseo ka basebetsi haholo tšebelising ea marang-rang. O re ke baithuti ba 112, 441 ba abetsoeng lihlapiso selemong sa lichelete sa 2022-23-24, ba

atlehileng ho phethela lithuto tsa bona ba 21,898.

A re ba ikemiselitse ho tla tšoara 'moka oa khohola-koqo o tlo tšohla boemo ba thuto kahar'a naha, le hore thuto e ke e be e arabelang litlhoko tsa hona joale. O re thuto e ntse e nyotobela kahar'a naha ka hoo ba lokela ho tsetela le ho tšehetsa ka matla lithuto tsa mahlale, boqapi le tsa mosebetsi ea matsoho hore baithuti ba tsebe ho ithehela mosebetsi.

Litaba tsena o li boletse a arabela potso ea Morena oa Sehlooho oa Matšekheng, Peete Lesaoana Peete, 'ea hore lekala la Lichelete le fane ka lipalo-palo tsa baithuti ba thusoang ke NMDS boemong ba Thuto e Phahameng Lesotho le kante ho naha, nakong ea lilemo tse peli tse fetileng, le hore na ke ba bakae ba phethetseng lithuto tsa bona ba thusoa ke eona, le hore na ba abetsoeng mosebetsi makaleng a 'muso ba bakae le likhoebos tse ikemetseng.

A re ho bohlokoa hore baithuti bohle ba sebetsang ba lefe litsiane tsa 'muso e le hore bana ba bang ba mafutsana ba tsebe ho fumana monyetla oa ho kena sekolo.

## Tse ling tsa mathomo li hloka tšehetso

Litaba tsa phano ea ntlo ea ho phehela tse hlakileng koranteng ea la 14-20 Pulungoana 2024, li supa hore ruri likolo tse ling li hloka tšehetso e matla. Sekolo sa Mathomo ke lelapa le leholo leo Molimo a le fileng thomo ea "ho lokisa sechaba se mo lokelang." (Luka 1:17) Lelapa lena le ruta bana ba bangata ho bala, ho ngola, ho mamela, ho hlompha, ho ikokobetsa, ho mamella, esita le ho ba ruta lithuto tse 'maloa tsa mahlale tseo bana ba tlang ho ithuta tsona ka botebo methating e hlahlamang ea thuto.

Ha ngoana a qetile Sekolong sa Mathomo, o lebetsoe hore bonyane a be a tseba ho bala le ho ngola. Likolo tse Bohareng ha li amohela ngoana ea sa tsebeng ho bala le ho ngola, etsoe ha se thomo ea tsona ho ruta ngoana ho bala le ho

ngola.

Mophatlalatsi oa litaba, kapa tichere, kapa ngaka, kapa mooki, kapa lepolesa, kapa lesole, kapa 'muelli oa molao, kapa moruti oa kereke, kapa setsebi lefapheng lefe kapa lefe la thuto, o seo a leng sona hobane a rutuo ho bala le ho ngola ke Sekolo sa Mathomo. Hona ho supa hore Sekolo sa Mathomo ke motsoali oa bobeli kholisong ea ngoana. Har'a tse ling se ruta ngoana ho phelisana ka khotso le bana ba bang, le ho ba hlompha. Ka lebaka lena se lokela ho lula se ntlafatse mafapheng ohle a bophelo ba sona, hore se lokisetse naha le sechaba bana ba khotsofatsang, ba khahlang batsoali. Sekolo se ntlafatseng se lula se na le bana ba bangata hobane batsoali ba tla rata ho isa bana ho sona. Batsoali bohle ba thabisoa ke ho bona bana ba bona ba tseba ho bala le ho ngola hantle, e bile ba ruile tsebo ea

ho itlhompha le ho hlompha batho bohle.

Litichere tsa Likolo tsa Mathomo, li tlameha ho ba le bonyane lengolo la certificate ea thuto ea mathomo. Ba bang ba na le mangolo a diploma, ba bang a degree, ba bang mangolo a masters. Lena ke lebaka le leng se supang bohlokoa ba Sekolo sa Mathomo kholisong ea ngoana.

Mosotho oa heso, ebe tumelo ea hau e re Sekolo sa Mathomo se u rutileng ho bala, ho ngola, ho mamela, ho hlompha, ho ikokobetsa, ho mamella, se boemong bo joang? Ha eba u lumela hore se tlokotsing se hloka tšehetso, se tšehetsoa joang, ke mang, hore se 'ne se tsebe ho aha batho ba bohlokoa joaloka uena? Ke u mema hore re arabe lipotso tsena koranteng e hlahlamang.

### 'Mabathoana Khotle

Contacts: +266 28350 466 / 6260 0983 (Whats app)  
Email: moeletsioabasotho@gmail.com



### Editorial

Lesoetsa Rakubutu (Editor)  
(+266) 58490670 / 62031949  
editor@moeletsioabasotho.co.ls

Lehlohonolo Mohale (Sub-editor)  
(+266) 58 771 507 / 62 771 507  
subeditor@moeletsioabasotho.co.ls

### Newsroom

Nthabeleng Seithleko 57 665 038/ 68 216 721  
nthabeleng.seithleko@moeletsioabasotho.co.ls

Tšeliso Thakholi (Sports) 58 540 853/ 63 480 404  
tseliso.thakholi@moeletsioabasotho.co.ls

newsroom@moeletsioabasotho.co.ls

### Advertising

Thabo Lesaoana  
(+266) 28 350 466/ sales@moeletsioabasotho.co.ls

### Production Desk

'Mateele Liqa, Sr. Canicia Nthunya

### ESTATE OF MAMOTLOHELOA ADELINA THOKOENG RANTSAILA/E03/21

**Notice is hereby given in terms of section 63(6) of the Administration of Estate and Inheritance Act, 2024, that the liquidation and distribution account lies open for inspection within three weeks of its publication.**

**DATED AT MASERU ON THE 18TH DAY OF NOVEMBER 2024.**

# Pokello ea lekhetho la polasetiki

## Nthabeleng Seitlheko

**P**okello ea lekhetho la polasetiki e tla kenya letsoho ntlafalong ea moruo le tikoloho kaha ho tla ba le mekhoha e mecha ea ho boloka tikoloho e hloekile. Litaba tsena li boletsoe ke Mookameli oa Morero Setsing sa Pokello ea Lekhetho (RSL) Mannayane Toloane, puisanong le Koranta ka la 18 Pulungoana monongoaha.

O thoholelitse 'Musu oa Lesotho ka tefiso ea Lekhetho la 90c la polasetiki ka le reng hona ke kholo nalaneng ea Naha ea Lesotho molemong oa ntlafalo ea moruo kaha linaheng tse ling e le khale polasetiki e lefelloa. A re ka thoko le taba ea ntlafalo ea moruo ho tlo thusa naha ho bolo-

ka bohloeki ba tikoloho 'me eona ha e ntlafetse e ka thusa bohoheling ba lintho tse ngata.

O re pokello ena e tlo qala ka la 1 Tšitoe monongoaha, ka hona ba lumela hore ho tla ba le phetoho e kholo lilemong tse tharo. A re ho boetse ho tla thusa litabeng tsa boqapi, ho ntlafatsa litšebeliso tsa bona e le RSL kaha chelete e joale e ne e sa kenyeletsoa pokellong ea mefuta eohle ea lekhetho.

Mookameli oa lebenkele la Clicks Lesotho 'Maneo Nyakane, o itse ho tloha 'Musu oa Lesotho o ntse o lohotha ho ntša polasetiki tšebetsong molemong oa ntlafalo ea tikoloho, bona ba ile ba hla ba qalella ho e ntša kaha ha joale lebenkeleng la bona ba sebelisa lipampiri ho tšela thepa kapa more-



ki a nka thepa ka matsoho kapa a itlela le mokotla oo a

tšelang ho ona.

O re esale ba sebelisa mokhoa ona o mocha, ba atlehile ho boloka bonyane M3, 977.00 ho isa M5, 147.16 ea chelete eo ba neng ba e sebelisa ho reka polasetiki. A re qholotso eo ba ileng ba tobana le eona ke ho lahlehela ke bareki ha ba qala mosebetsi ona oa ho se sebelise polasetiki.

O ipilelitse ho bo-mphato'ae ho ikamahanya le melao, ho amohela liphetoho le ho bona hore tikoloho e ba e hloekileng joaloka linaheng tse ling hobane tsela ena ea tšebetso e thusa haholo kholong ea moruo.

Ofisiri Lefapheng la Tikoloho, Tšasanyane Kobeli o bontšitse ha pokello ea lekhetho la polasetiki e tlo thusa ntlafalong ea tikoloho kaha ho tla tšehetsoa matlole a boqapi le lintlafatso. A

re ba qala tšebetso morao hobane e ne e lokela ebe e qalile ka la 1 Pulungoana monongoaha.

O re ho latela melao e teng, ba fane ka bonyane lilemo tse tharo hore polasetiki e be e felile kahar'a naha, 'me ba hlahisang ba na le mekhoha e mecha, ba e sebelisang ba se ba sebelisa lintho tse ling joaloka ba rekisang lijo tse potlakileng. A re batho ba tla sebetsa ba sa ipapisa le molao ba tla nkeloa likhato tsa molao 'me kotlo ke M10,000.00.

O re o qalile ho susumetsa litaba tsena ho tloha ka selemo sa 2005 eaba ha ho nko ho tsoa lemina, ha ka sa 2020 li ile tsa kikitlala ho fihlela hona joale Lekhotla la Matona le fihletseng qeto ea hore melaoana eohle e sireletsang tikoloho e kene tšebetsong.



## 'Musu o tšoenngoa ke Li-zama-zama

### Tšeliso Thakholi

**M**usu oa Lesotho o ntšitse polelo e matla ka Ntlong ea Bakhethoa ba Sechaba, eo ka eona e thobang lipelo tsa Basotho mabapi le liketsahalo tse nyarosang tsa batho ba hakenyetsoang ho 4,000 ba kenyeletsang Basotho, bao ho tloaetsoeng hore ke Li-zama-zama ba tšoasehileng ka mpeng ea lefatše mora-

fong o seng o sa sebetse oa Stilfontein, Afrika Boroa.

H'a etsa polelo lebitsong la 'musu Mohlomphehi Matjato Moteane o boletse hore ho fihlile tlhokomelong ea 'Musu oa Lesotho ka Lekala la Machabeng hore ho na le ketsahalo e nyarosang e nt-seng e etsahala morafong o seng o sa sebetse Profensing ea North West, Naheng ea Afrika Boroa moo batho ba bitsoang Li-zama-zama ba neng rafa teng ka thoko

ho molao.

O re ho latela tlaleho ea a e fumaneng, ho na le ba ntseng ba tsoa kahare ho mokoti, 'me bao ba ntshe ba tšoaroa ke sepolesa ka lebaka la ho rafa ka thoko ho tumello. O tiisa hore ho fihlela hajoale ha ho e-s'o tsebahale hore na ebe ho na le matsoalloa a Lesotho a amehileng ketsahalong ena e malimabe. "Empa leha ho le joalo re ntse re emetse tlaleho e feletseng,

ho tsoa ho ba nang le tokelo ea ho etsa joalo, malebana le ketsahalo ena." A rialo.

H'a tsoelapele ka polelo ena ea hae, Moteane o re 'Musu oa Lesotho o na le tšepo e sa thekeseleng tabeng ena ea ho rafa ka thoko ho molao hore Naha ea Afrika Boroa e tla e fumanela tharollo, molemong oa poloheho ea sechaba le ho qoba tahlehelo ea bophelo. A totobatsa hore tharollo ea moshoelella litabeng

tsa mofuta ona ke ho sebetsa ka thata e le sechaba le 'Musu oa Lesotho ho theha mesebetsi le ho holisa moruo e le hore Basotho ba khutlele hae ba tlo kenya letsoho ho holisa moruo oa naha le ho kenya letsoho tsoelapeleng ea naha ea habo bona.

A leboha bohle ba nt-seng ba kenya letsoho ho bona hore batho bao ba tšoasehileng ba fumana lithuso ha ho ntse ho etsoa ka hohle hore ba qetelle ba tsoile kaofela ka morafong.

# RE TŠEHETSA BACHA

## Tšeliso Thakholi

**E** mong oa basali ba ntseng ba le banyenyane haholo ilemong, 'Matlotliso Ramokoena (25) ea bonahalang a e na le leseli le lehlo la ho sebelisa talenta ea hae litabeng tsa khoebo, o thehile khoebo e nyenyane e hlahisang mefuta e fapakaneng ea jeme ea liperekisi, litholoana le lipeo e bitsoang Sunshine Fruits & Seeds e thehiloeng ka selemo sa 2020, h'a qeta ho phethela lithuto tsa hae ka Sekolong sa Lithuto tsa Mahlale sa Limkokwing.

### Seo esale e le toro ea ka

Haesale ke rata ho ba mosali ea ikemetseng khoebo, ke sa batle ho hiroa ho latela ka moo ke ileng ka ithuta ka ho sotleha ha batsoali ba ka, moo ba neng ba hiriloe teng. Ka itjoetsa hore seo ke se batlang bophelelong ba ka, ke hore ke itšebetse ka ho ithehela khoebo e seng ke hiroe. Toro ea ka

e 'ngoe e kholo e bile hore ka khoebo eo ke tla e ithehela eona, ke batla ho fetola bophelo ba ka le ba batsoali ba ka. Khoebo ena e ile e nthusa hore ke fihlele toro ena kaha e se e le 'na ea hlokometseng 'm'e oa ka kamora lefu la ntate oa ka.

### Qaleho ea khoebo

Khoebo ea tlhahiso ea jeme le lipeo e sale ke e rata ho tloha bonyenyane ba ka le ha toro ea ka e ne e le ho ipona ke na le likhoebo tse fapakaneng tse kang tsa ho etsa jeme ka liperekisi. Hoba mohoebi ea itšebetsang, ha ho oa fapakana haholo le ho hiroa hoba motho o ntse a etsa mosebetsi oa letsatsi ka leng o tšoanang hantle le ha a hiriloe.

Ho fetola likelello tsa bacha

Ke taba-tabelo ea ka ho fetola mehopolo le likelello tsa bacha, tsa ho tloaela hore ha ba qeta ho fumana mangolo, ba e-na le litsebo ebe ho e-na le ho hohela likhoebo ba qalella ho kena mona le mane ba tšoare mangolo ho ea batla mosebetsi. Takatso ea ka ke ho bona bacha le basali

ba bacha ba itšebetsang e seng ba batlang ho hiroa. Ke batla ho bona bacha ba

nthusang khoebo ena ea ka, 'me morero ke hore isao palo ena e eketsehe kaha

tse ngata hoo hoja e seng ka tšebetso ea metsoalle le bafani, nka be ke ile ka



abetsoeng mangolo likolong tse fapakaneng ba phahamisa tlhahiso ea mesebetsi kahare ho naha isao. Ke na le bacha ba bararo feela ba

re tlii'o bula khoebo e 'ngoe Maputsoe.

### Liqholotso

Ha ke qala khoebo ena ke ile ka thulana le liqholotso

hla ka lahla mofuta ona oa khoebo ka qala o mong. Kamora lithuso tsa lichelete ke ile ka bona khoebo e hola ka sekahla se sehlo. Ho feta mona morero ke ho tla bula sekolo sa tlhahiso ea jeme le lipeo tsa Sesotho.

### Khoebo

Khoebo ke karolo ea bophelo ba ka, 'me le molekane oa ka oa tseba hore ha ke hloke mang kapa mang ea ka nkarohanyang le eona. Hoba ke sena seo ke leng sona kajeno ka lebaka la eona. Ho ithehela likhoebo ke tsela e 'ngoe eo bacha ba ka tsebang ho phela le ho iphelisa. Khoebo e boetse e batla botšepahi. Empa mocha o lokela hore a qale pele ka ho itšepahalla linthong tsohle a tle a tsebe ho tšepahalla khoebo ea hae.

### Keletso ho bacha

Keletso ea ka e kholo ho bacha ke hore ba seng ba e-na le mangolo ba iqalle likhoebo, 'me ba nang le litalenta tsa tlhaho feela ba sa li ela likolong ba kopane 'moho le ba nang le litsebo ho sebetse 'moho le ho arolela malebela. Selemong se tlang re sebetse ka thata ho fetola naha ea habo rona, re e ise moo re batlang teng ka ho itlhamisetsa mesebetsi e fapakaneng.



**Listen To Us Here**

**97.6 fm bokamoso** Mafeteng, Mohale's Hoek, Qach's Nek, Quthing  
**94 fm bokamoso** Maseru, Berea, Leribe  
**98.2 fm bokamoso** Mokhotlong, Thaba Tseka, Butha Buthe

[www.bokamoso974.co.za](http://www.bokamoso974.co.za)

# Ba hlaola ba furallane



## Nthabeleng Seitlheko

**M**okha oa Liketso le Bophethahatso (BAP) o file Mohlomphahi Tona-Kholo Samuel Matekane ho fihlela Labone hore a be a lelekile Mongoli oa Lekala la Matla, Tankiso Phapano, ho seng joalo, BAP e tla ikhula pusong. Tsena li bile ka la 17 Pulun-

goana monongoaha.

Puisanong le Motlatsi oa moetapele oa BAP Motlatsi Maqelepo, ka la 20 Pulungoana monongoaha, o hlalositse hore boemo boteng kahara bona e le Ma-BAP ke ba hore morao tjena ba na le ho fapakana ka maikutlo.

A re ba bile le phutheho e thata moo ho bileng le taba ea ho ntša BAP kahara Puso, empa melao ea naha le tsamaiso ea paramente e hlakile ka tsela eo mekha e kenang le ho tsoa kahar'a

puso.

O re ba ile ba kopana nako e fetileng e le k'hok'hase ea paramente ea BAP ba ngol-la Motsamaisi oa Lipuisano Paramenteng hore ba tloha ka bohanyetsing ba ea ka pusong. Ka hona a re ka tsela e tsoanang, qetellong ke k'hok'hase e nang le tokelo ea ho sheba boemo ba eona kahara puso ha ho hloka hla.

Sena o se bua a ipapisitse le ho thulana ka maikutlo ha litho tsa Komiti ea Phethahatso ea BAP, tulong ea eona ea la 17 Pulungoana monongoaha, moo ho neng ho seka-sekoa bokamoso ba mokha ka pusong, kamor'a hore boetapele ba eona bo kope Tona-Kholo ho hlabisa Mongoli e Moholo oa Lekala la Matla, Tankiso Phapano thoto ka monkhoane, ka mor'a ho se ikobeletlae tsa letona lekaleng leo.

O tsoetsepele hore h'a lumellane le maikutlo a litho tse ling tsa Komiti e Kholo ea Mafube, a reng mokha oa habo o ikhule kahar'a



puso, kamor'a ho se shebele litaba 'moho le mokha o etellelang puso.

Ka lehlakoreng le leng, Mongoli-Kakaretso oa BAP Lepolesa Makutoane, o tisisitse hore ba hlaola ba furallane kaha moo Komiti ea Phethahatso e entseng qeto ba bang ba sa rate ho ikobela eona, ba ntša liqeto tsa komiti ho li isa sechabeng. A re ha joale ha na matla a ho phatlalatsa qeto ea Komiti e Kholo mabapi le boemo ba BAP kahar'a puso kaha seo se tla etsahala ka molao.

O supile hore Tona-Kholo o lebile leetong a tseba seboko sa bona sa nako e telele, e bile taba ena e haba selemo joale esale ba sebetsana le eona, ka hona eena o se a tla fumana qeto ea Komiti e Kholo ea BAP.

Mongoli e Moholo Lekaleng la Matla Tankiso Phapano le Moetapele oa BAP, Prof. Nqosa Mahao, eleng Letona la Matla, ha ba isane 'moho 'me ba hloa ho sebeletsa lekala leo. Eena Phapano o ne a lelekoe kahar'a Mokha oa BAP.

# Litaba tsa lithole li nka mothinya o sele

## Nthabeleng Seitlheko

**M**olula-Setulo oa Komiti ea Paramente a alosit-seng Tšebeliso ea Lichelete tsa Sechaba (PAC) 'Machabana Lemphane Letsie, o re komiti ea habo e fumane hore ho na le kampani e tlabotseng selekane le Lekhotla la Motse-Moholo (MCC) ho hleka lithole le lithotobolo. O bole-tse tsena ka la 20 Pulungoana monongoaha.

O re komiti e fumane hore lithole le lithotobolo tseo li qhalloang ho tsona, ha li ikarabelle ho bo-mmasepala ba litoropo, ho na le kampani e ileng ea kena tumellanong le 'Musu oa Lesotho ka selemo sa 2019, ka sepheo sa ho bona hore litoropo tsa naha li'a hloeka, empa e nyameletse moo ho sa tsejoeng.

O re bona e le komiti ba fumane hore bo-mmasepala ba tseba taba ena, 'me ha ho e-šo hlake hore na tumellano e ne e le efe, ana hona a le mokitlakane khahlanong le 'musu kapa kolo-toa ona kaha ho bona ho sa le ho le lerotho, leha ho le joalo ba tla fana ka letsatsi leo litaba tsena li tlang ho ba kapel'a komiti, hobane ba iphumanetse mohoebi eo.

Liofisiri tse Kholo tsa Leka-



la la tsa Lehae, Sepolesa, Puso ea Libaka le Borena, li re kampani ea Prime Enviro ea United Kingdom, e ile ea fuoa matla a ho hleka lithole hohle Lesotho mona, bakeng sa lilemo tse 25, ho tloha ka sona selemo seo, empa ho fihlela lena ha li tsebe mabaka a ho se qale

mosebetsi 'me tsa sitoa ho araba hore na ha li e sale morao ka mabaka afe.

Litabeng tsena, ho hlahela monghali Katiso Sello, e le Mosotho ea ileng a fuoa liabo tsa Kampani ena, ka linoko tsa 20%, feela lekala ha le re letho ka eena ho mo laela ho tsoma balekane

'moho le eena.

Komiti e ile ea makalla lekala le ileng la mome-la nakong eo baahi ba Ha Tšosane le ba libaka tse ling ba neng ba llela paramenteng hore e kene lipakeng tsa bona le 'masepala, o sitoang ho nka boikarabelo ka thotobolo e sebakeng sa

bona, empa le tseba hantle hore ho na le kampani e fuoeng mosebetsi oo ka lilemo tse boletsoeng.

Litaba tsena, li hlaheletse tulong ea komiti eo le lekala le boleloang, moo le ntseng le araba khoao ea Mohlahlobi e Moholo oa Libuka tsa 'Musu ka lona.

# Banna ba tlalehe tlhekefetso

## Nthabeleng Seitlheko

**M**okhatlo oa SHE-HIVE Association ka kopanelo le mafapha a fapakaneng o ketekile Letsatsi la Machaba la Banna, le ba hopotsang ho ema ka hohle ho nena tlhekefetso le ho e tlaleha. Litaba tsena li bile ka la 19 Pulungoana monongoaha.

Lebitsong la SHE-HIVE 'Maleshota Setota, o hlalositse hore letsatsi lena le ketekoa selemo le selemo ho hopotsa banna boikarabello ba bona ho thibela tlhekefetso. O re ke tsela eo ba ba bontšang tsotello ka eona kaha bohlo ba nako ba ne ba siheletsoe morao.

O re banna le bashanya-

na ba lokela ho tlaleha tlhekefetso ea mofuta eohle le ho e nena kaha ho etsa joalo e le mohato o mot-



le oa ho ba le sechaba se phetseng hantle 'meleng le moeng, se bile se e-na le khotso.

A re e bang motho a tšaba ho tlaleha tlhekefetso sepoleseng a ka tlalehela motho ea haufi le eena, 'me seo se ka thusa hore a thusoe ka tlhabollo ebe mohlekefetsi o nkeloa likhatso tsa molao. O re ke takatso ea bona hore kamor'a ketekelo ea matsatsi a kang ana, ho bonahale litlaleho tsa tlhekefetso li phahama.

P/C Matsoso Montši e bile e le setho sa Mokhatlo oa LMPS Men's Forum, o itse ho ne ho sa tloaeleha hore motho a ka tloha lapeng e le monna ho tlaleha tlhekefetso, hobane banna ba tumme ka ho sebelisa maele a 'monna ke nku ha

lle' a seng a sa sebetse.

O re banna le bahlankana ba tlameha ho tlaleha tlhekefetso ea mofuta eohle, kaha ho etsa joalo ho ba thusa ho nena litlolo tsa molao. O re ha ba hlokomela hore banna le bahlankana ba bonahala ba etsa litlolo tsa molao ka bongata, ba ile ba ithuta hore bothata ke eng, eaba ba ikeletsa e le banna ba mapolesa ho theha mokhatlo o tla ba thusa ho kopana le sechaba haholo banna le bahlankana ho etsa matšolo a tlhokomeliso.

O re pele e ba mapolesa ke karolo ea sechaba ka hona ba lokela ho nka karolo litabeng tse amang sechaba kaha e se mekhelo. O re banna ba tsebe hore basali ba sireletsoa ke bona, ha ba ba hloriga ba senya lefatše kaha basali ha ba le matla, malapa a hola hantle a bile a thabile.

"Banna ba eme ka maoto hohle moo ba phelang teng 'me ba nene tlhekefetso le ho loanela kholiso e ntle ea bana ba bashanyana kaha kamoso ba tla be ba tsoere malapa." Ke Montši eo.

Moemeli oa Mokhatlo oa Southern African Policy Alcohol Alliance Thabo Mokhutšone, o re ba rata ho ntlafatsa meralo e mecha le ho matlafatsa e teng litabeng tsa tšebeliso ea joala le ho etsa ebe ba fana ka lipalo hore na tšebeliso e mpe ea tai le lithetefatsi e kenya letsoho joang litabeng tsa tlhekefetso.

Ha joale o re ba ntse ba etsa liphuputso hore tšebeliso ea joala e na le khahlamelo efe, Ha Mokhothu, Teya-Teyaneng le Lithoteng, Maseru. O re batho bohle ba lokela ho sebelisa joala ka tsela e nepahetseng e nang le seriti, 'me 'muso o ntlafatse melao molemong oa sechaba.

E mong oa bacha ba bileng ketekelong ena, Tšeliselang Masasa, o hlalositse a thabile kaha a hlokomela hore e le bahlankana ba se ba kenyeletsoa linthong tse ngata 'me tšepo ea bona e khutlile kaha ba ne ba bona e ka bophelo ba bona bo tla ba tsietsing.

O ipilelitse ho bacha ho nena tlhekefetso haholo bahlankana hore e tle e be bo-ntate ba kamoso ba nang le boikemelo. A re tlhekefetso e ngata bacheng bohlo ke ea lipuo e etsang hore bacha ba bang ba se nke karolo le linthong tse ba amang, ka hona ho bohlokoa hore e le bacha ba nke karolo litabeng tsa mofuta ona ho ba karolo ea sechaba e tsoetseng pele.

## 2030 litšoaetso tse ncha tsa be li felile-Mothae



## Nthabeleng Seitlheko

**E**le ho matlafatsa litaba tsa bophelo bo botle ba bacha, ka kotloloho litabeng tsa toantšo ea HIV/AIDS, ntlafalo ea bana ba tlokotsing le bacha, USAID South Africa, e fane ka tšehetso ea chelete e kaalo ka USD 128Millione, ka la 14 Pulungoana monongoaha.

Chelete ena, e tlo tšehetse morero oa Bokamoso, Secure le Bophelo bo botle. Morero oa Bokamoso o tlo kenngoa tšebetsong ke Mothers to Mothers, ebe Bophelo bo botle eona ke EGPAF.

Mpolokeng Mohloai ho hlaha Morerong oa Bokamoso o hlalositse hore morero ona o tlo sebetsana le ho bona hore bacha ba tseba ho ithehela mesebetsi

ka ho itlhalisetsa, ba fumana litšebeliso tsa bophelo tse ba natefelang, ba bone le hore bana ba ea likolong. A re ba boetse ba t'lo loantš'a litaba tsa HIV/AIDS ho bana ba lilemo li 0 ho isa hot se 17 haholo ho felisa litšoaetso tse ncha.

A re taba ea litšoaetso tse ncha kahara bacha le bana e ntse e le qholotso 'me ba lokela ho fana ka thuto e matla.

Mookameli oa UNAIDS Lesotho Lebohlang Mothae, o itse 95% ea Basotho ba tseba boemo ba bona, 95% e litlhareng, ha 95% kokoa-hloko ea bona e se e sa tšoaetsane. Ka hona o re ba rata hore ka selemo sa 2030 litšoaetso tse ncha tsa be li felile kahar'a bacha. A re ho bacha 94% ho tloha ho lilemo tse 0 ho isa hot se 14 ba tseba boemo ba bona ba tšoaetso, 96% tšoaetso ea bona e se etsa tšoaetse,

ha 95% e le litlhareng. O re ba rata hore 75% ea mafu a bakoang ke litaba tsa HIV a be a felile ka selemo sa 2030.

O itse ba hloka hore 'Muso oa Lesotho khakanyong ea eona ea lichelete o abele M30Millione toantšong ea lefu lena, ho qoba hore ha bafani ba tsamaea naha e be se na mokhoa oa ho iketsetsa khahlanong le HIV.

Mookameli oa Meralo, Lekaleng la Ntšetsopele ea Sechaba, 'Mankhatho Linko, o hlalositse hore ka tšehetso ea USAID bophelo ba bana ba tlokotsing bo tla ntlafala, kaha 49% ea bana e tlokotsing ka hoo ba lokela ho sireletsoa khahlanong le tlhekefetso.

A re litšebeliso tsa bophelo li lokela ho anela bana bohle ka bolokohi 'me ka merero e kang ena, lenyalo la bana ba tlase lilemong

le ea feela, litaba tsa boiketsetso li ea atleha le ho bona hore bana bohle ba fumana bophelo bo atlehileng.

Mokhothu Makhwanyane lebitsong la Komiti ea Paramente, o hlalositse hore ba tlo sheba ka thata hore khakanyo ea lichelete e kenyeletsa litaba tsa boiketsetso tsa naha khahlanong le HIV/AIDS e le hore selemo sa 2030 se fihle Naha ea Lesotho e na le boikemelo etsoe bafani ba ntse ba qepha.

A re ha chelete e tšehetsang litaba tsa HIV/AIDS e le teng naha e tla ntlafala moruong oa eona kaha ho tla etsa hore merero e bang teng e be e tla ngatafatsa mofuta e meng ea litšebeliso.

E mong oa bacha ba phelang le tšoaetso ea HIV/AIDS, Paleho Rameno ho hlaha Qoaling, o hlalositse hore ho thata ho bashanyana ba bang ho bua ka litaba tsa bona tsa tšoaetso hoo ba bang ba qetellang ba nyahlatsa litlhare ho sa hloka hore, ba bang ke ho hloka tšehetso ea lapeng le lijo.

O re ka merero e kang ena, bophelo ba bacha ba bang bo t'lo feteho kaha ba t'lo koetlisetsoa ho iphelisa le ho theha likhoebo. O re ba ntse ba tobane le phephetso ea ho nyefoalo le ho khetholoha empa ba hlola seo ka ho kopana 'moho ho qoqa le ho tšehetsana.

"Ho phela le tšoaetso ha se boikhetlo, ke qholotso joaloka mafu ohle ka hoo bacha ba se lumelle hore bokamoso ba bona bo amehe ke ho phela le kokana-hloko ea HIV." Ke Rame-no eo.

# PAC e tsota liqeto tsa LNDC



## Nthabeleng Seitlheko

**E**a tšoereng molepo e le Mookameli oa Loti Brick Ramokoabeu Lewaneka, o re kampani ea Hippo Transport e ile ea ikhula lebelong la ho reka kampani ea 'muso ea setene, e kikitleng licheleteng, hoo e sitoang ho reka thepa le ho lefa basebetsi. Tsena o li buile kapelela Komiti ea Paramente e alositseng Tšebeliso ea Lichelete tsa Sechaba (PAC), ka la 19 Pulungoana monongoaha.

O re ho ikhula ha Hippo Transport thoholanong ea theko ea Loti Brick ho ile ha susumetsa bookameli ba khoebo ena ho kopa tumello ea Lekhotla la Matona hore e tsoelepele ka lipuisano le Lephema Executive Pty Ltd, ka sepheo sa ho hlahloba hore na e tla fihlela lipheho tsa eona.

O re ho ile ha ntšoa lipapatso ho tloha ka selemo sa 2022, moo ho neng ho iketa Hippo Transport, Lephema Executive le banna ba Basotho ba neng ba e-s'o ho ngolisi ka nako eo, ho fihlela e hira setsebi se ileng sa elets'a hore ho luloe majoana, ho hlahlojoe hore na bao ba tla fihlela lipheho tsa ho tsamaisa khoebo eo.

Komiti e bile ea makalla Lewaneka ka ho phatlalatsa hore Hippo Transport, e ne e ipehetse ho reka Loti Brick ka M26Millione empa o sitoa ho beha poaneng chelete eo Lephema Executive e neng e re e ka e reka ka eona.

Litaba tsena, li tla kamor'a hore Loti Brick e koaloe ka lebaka la ho hloka lichelete, e se e sitoang ho reka thepa le ho lefa basebetsi, le ho fana ka thepa e neng e se e lefetsoe ke bareki.

Mokhethoa oa Likotsi ka ho RFP, Itumeleng Rantšo, o ile a sisinya hore Koporasi ea Ntlatfats'o ea Moruo oa Lesotho (LNDC), e koaloe ka ho feletseng, kaha e sen-

ya lichelete tsa naha ena le ka meputso ea bohanka ba eona bo sa phetheng thomo ea bona.

Rantšo ea tlatsitsoeng ke litho tsa komiti ea PAC paramenteng, o re Loti Brick e shoelletse matsohong a LNDC e sitoang ho laola litš'a le matlo a 'muso, 'me litho li bile tsa lumella ka popo ea setšoantšo sa molao se qhalang koporasi eo.

Komiti ena, e bile ea laela LNDC ho ea lefa basebetsi ba eona ba behelletsoeng ka thoko ho mosebetsi, le ho emisa hanyenyane ka boinahano ba ho kena lipuisanong tsa thekisetano ea Loti Brick le kampani ea Lephema Executive.



## Don't practice what you don't want to perfect

**Teboho Matjeka**  
63574502/58911803

There's an old cliché which most of us if not all are familiar with, "practice makes perfect." That on its own should help us make continuous decisions in our lives. We should be looking at our habits and either recite or remember that cliché. When our habits have the potential to improve the quality of our life we should recite it with pride, knowing that we are working towards what we continuously want to perfect at the later stage of our life or when we are

if in relationships we practice separation every time we feel challenged, what are we teaching our hearts and minds, that they should perfect the art of quitting anytime things look not so rosy? Do we think if we go about things this way we can hold down the next relationship or marriage? What guarantee do we have that the next relationship will not have challenges? How will we solve them differently when we haven't rehearsed any better? What are we practicing, is it really our ultimate goal? If we want to be honest, nobody practices soccer and perfects rugby,



embarking on not so profitable habits, then remembering the cliché may help us make adjustments. This is not limited only to habits but also to our life practices,

we can only attain better results and get better skills of what we do over and over. Therefore, it is only safe not to practice what we don't want to perfect.

**Moeletsi oa Basotho**  
**MOELETSI oa BASOTHO**



 @oaBasotho  
 WhatsApp +266 680 78 1  
 Moeletsi oa Basotho

**To advertise with us, please contact:**

**Tell: (+266) 2835 0466**

**Email: [advertsmoeletsiobasotho@gmail.com](mailto:advertsmoeletsiobasotho@gmail.com)**

1  
 Sesotho  
 Newspaper  
 in Lesotho

# Shelile o laela LNDC ho alima melata chelete

## Nthabeleng Seithleko

**B**ookameli ba Koporasi ea Ntlatfatso ea Moruo (LNDC), bo re Letona la Khoebo Mohlomphehi Mokhethi Shelile, le bo fosisitse la bo tloisa molao ka ho laela koporasi ho alima lifeme tsa melata, tsa liphahlo chelete e kaholimo ho M10Millione eo li seng li sitoa ho e lefa. Litaba tsena li hlaleletse ka la 19 Pulungoana monongoaha, tulong ea Komiti ea Paramente a alositseng Tšebeliso ea Lichelete tsa Sechaba (PAC).

Litaba tsena li hlalositsoe ke PAC kamor'a hore Mohlahlobi oa Libuka tsa 'Musu, a tlahe hore Lukis Manufacturing, eleng feme ea Ma-India e sitoa ho lefa mokitlane oa M2Millione.

Ramolao oa LNDC Florence Mota, o re ha kopora-

si e bolella letona ka hore ho na le lipehelo tse tsamaisang phano ea mekitlane, le ile la ba sunya qeto ea Lekhotla la Matona e fanyehang lipehelo tse kenyeletsang hore ea fuoang mokitlane, ebe Mosotho-mohloa le hore kampani e fuoang chelete e be le liabo tsa 75% tsa Basotho.

Ka lehlakoreng le leng, o re lona letona lena, le ile la kopela, Juty Free Sourcing ea kantle ho naha, ho nyetleletsoa kalimo ea M10Millione ka eona tsela eo. Litaba tsena li tla boela li tsoelapele hape ka matsatsi a tlang ho behoa.

Ho sa le joalo Moetapele oa Mokha oa Sechaba sa Basotho (BNP), Machesetsa Mofomobe o re kamor'a hore bookameli ba LNDC bo tiisetse PAC ka bopaki ba litokomane hore letona le boleloang le ile la laela LNDC ho alima lifeme tsa



melata chelete, empa li sa fihlele lipehelo tsa kalimo, DCEO le sepolesa li ka be li ile tsa phothoma ho nkela ba amehang likhato tsa molao.



Mazenod PRINTING WORKS (Pty) Ltd  
 57396597  
 28 350 815  
 28 350 466  
 lesaonanat@gmail.com

Scan me

U se u ka fumana Lifela Tsa Bakriste ho marangrang a boletsoeng ka tlase.

"Get the Akello app on Play Store, App Store, or Huawei App Gallery for Mazenod books and more. Download now!"

<https://library.akello.co/downloads>

akello

www.moeletsloabasotho.co.ls

# ELEGANCE COUTURE

Mega Fashion Couture

ELEGANCE FABRIC THAT SPEAKS

MOLETSI DA BASOTHI

PHYSICAL ADDRESS: TRADORETTE BUILDING ROOM B22

ELEGANCE COUTURE


ELEGANCE COUTURE

+266 58524642



# MOB KIDD'S EDUTAINMENT

**Puzzle MOB 92-4563**



**Across**

- 1 Seletsoa sa Basotho se entsoeng ka lehlaka le khoele. (5)
- 5 Mekhabo le metako leboteng la seotloana.(6)
- 8 Sebetsa sa banna se entsoeng ka thupa mme se na le kotofa hloohong.(4)
- 11 Tholoana e bopehileng joalo ka mabele, e tholahala ka mebala o mofubelu le o mosehla.(10)
- 13 Nkho e tšelang metsi ea letsopa. ( 4)
- 16 Pina e binoang ke banna ka likolu ba binela fatše. (9)
- 17 Motoho o thata o phehoang ha ho etsoa joala. (6)
- 18 Papa ea hlama ea motoho oa mabele.(4)
- 20 Motjeko oa banana le basali moo ba khabang ka mahetla (7)
- 22 Molamu (6)
- 23 'M'e oa Napo (6)
- 25 Lihaba tse apelehetsoeng le mabolotsana.(4)
- 26 Lejoe le sebelisang ho sila leloaleng la Sesotho.(8)


**Down**

- 1 Lero la moroho o phehiloeng o nang le metsi. (6)
- 2 Kobo e entsoeng ka mokotla 'me e aparoa ke bashemane thabeng.(8)
- 3 Mokorotlo (10)
- 4 Sejana sa joang se khakeletsang lijo tse siloang (7)
- 6 Sesebelisoa sa ho noela metsi kapa joala se entsoeng ka khaketla ea tjoto. (6)
- 7 Lero la nama e apeshiloeng. (4)
- 9 Nkho ea letsopa e noellang joala. (9)
- 10 Sebetsa se motsu se entsoeng ka thupa le ka tšepe. (6)
- 12 Papali e bapaloang ke banana ba matsoele a emeng ho rapella pula. (9)

- 13 Sesebelisoa sa joang se tšelang lijo tse bolokiloeng. (6)
- 14 Ntlo ena e ka bitsoa mohlangoa fatše. (7)
- 15 Sebetsa sa ho tsoma linyamatsane. (5)
- 19 Lero la mokopu o apeshiloeng o nang le metsi. (8)
- 21 Sesebelisoa se pepang bana ba masea, se entsoe ka letlalo la nyamatsana. (5)
- 24 seletsoa se entsoeng ka lesapo. (5)

**SOLUTION**

**MOB 92-4462**





# TSA KEREKE

## Thuto ka litšebeletso tsa Kereke

### Staff

Missa Kerekeng e Katholike ke thapelo e kholo ea phutheho ea Kereke, ha se ea moprista kapa motho ka mong. Ka hona ha re ea tlameha ho etsa seo re se ratang kapa lithahasello tsa rona, empa re tlameha ho etsa seo Kereke e re laelang hore re se etse. 'Missa o fapakane le lithapelo tsa rona moo re leng inotsi joaloka likopanong tsa rona moo re fuoeng monyetla oa ho rapela ka moo re ka ikhethelang ka teng. Ke mantsoe a Fr. Suoane Julius Letsoela OMI h'a le Maria Mofumahali oa Lefatše, Mazenod, ka la 17 Pulungoana monongoaha.

Thuto ena e ile ea etelloa pele ke Sehlabelo se Halalelang sa 'Missa se etelletsoe pele ke eena Fr. Suoane Julias Letsoela OMI a tlatsane le Fr. Patrick Khali Khoaele OMI e le mong'a 'mishone.

Ha tsoelepele ka khotatso Fr. Letsoela o itse thutong ea pele Daniel o khotatsoa sechaba kamora hore se hlirisoe ke babusi nako e telele haholo, hore se rapele melingoana ea sona khahlanong le Molimo eo sechaba se mo tsebang. A re o ile a bona hore ka le leng Molimo o tla ntša sechaba seo kholehong ena ea matšoenyeho a bona. A re ntho eo a e buang ke hore bohle ba robotseng leroleng la sebe ba bang ba tla tsohela lehlohonolo.

Haele evangeling Mareka o khotatsoa ba tšoenyehileng hore mohla Jesu Kriste a tlang la bobeli o tla tla phutha ba lokileng, bana ba tla phuthoa ke ba tsohetseng lehlohonolo, ke batho ba sebeletseng toka. Athe bana ba tsohelang lihlong ba tla tsamaea leffing. A re Morena Molimo o fa bohle ba lokileng thomo ea ho sebeletsa toka ka linako tsohle. A re ha re sekamela ka moo batho ba etsoang hape ba hlirisoa



re tseba hore Morena Molimo o teng kahara bona, empa ha fumanehe kahar'a ba etsang ba bang hampe. A re Morena Jesu bophelong ba hae o ne a e ja le baetsalibe. A re lefatše la rona le tletse batho ba etsang ba bang hampe. A khotatsoa bakriste ho sebeletsa toka, e le hore ba tle ba tsohe le ba lehlohonolo.

A re mahlabelo a koetsoe ke Jesu Kriste, joalokaha khoeli ena e le ea ho rapella meea e purgatoring re tlameha ho ba e etsetsa Sehlabelo sa 'Missa ho ba rapella e seng ho hlaba liphoofolo.

H'a phethela ka thuto ka ho manolla 'missa o re ke thapelo e kholo ea Jesu Kriste, 'me o mema bohle ho rapele le eena, joalokaha sehlohlolo sa thapelo ea hae e le sehlabelo sa hae se fetohang monko o monate ho Ntata'e moo a fanang ka 'mele oa hae. A re 'missa hohle ea tšoana ha rea tlameha ho etsa ka moo re ratang hobane ke thapelo ea phutheho. A re le hoja ho na le likopano kahara kereke empa ha re le 'misseng re etsa ntho e tšoanang kaofela.

A khotatsoa bakriste ho bina hammoho le ba eteletseng pele litšebeletso e le ho bontša borapeli 'moho. A re kahar'a 'missa ho na le linako tsa khutso, tse fang bakriste hore joale ba ke ba thuse Lentsoe la Morena Molimo ho latela lithuto tseo ba li utloileng letsatsing leo, hape le ka ho soabela libe tsa bona. A re khutso ka bo-eona ke taba ea boitokisetso ba tsohle tse tlang ho etsahala, 'me moea oa Kriste o sebetsa khutsong eseng lerateng. A re ho na le puisano e tlamehang ho phethahala lipakeng tsa phutheho le moprista joaloka ho arabela ka nepo.

A qetella ka hore thapelo ea balumeli e arotsoe ka likarolo ho kenyeletsa mafapha ohle a batho, mohlala joaloka ka ho rapella Morena Papa, babusi ba sechaba, bahloki joalo-joalo esita le rona re le phutheho. A khotatsoa phutheho ho tseba tateliso ea hore na 'missa ha o nepahetse ke ha ho le joang, ba tlohele ho etsa lintho ka tloaelo, e se re ea fetela baneng joale ba hola ka eona. Fr. Letsoela ke Mongoli-Kakaretso Kopanong ea Ma-Oblata Lesotho.



## 2023-2024 SELEMO B

### MOKETE OA KRISTE MORENA

Daniele 12,1-3

Pesalema 15

Ba-Heberu 10,11-14.18

Mareka 13,24-32



**Khotatso**

### Borena ba hae ke bosafeleng

Le hoja Kriste esale a tsejoa e le Moren'a marena, Mokete oa Kriste Morena o ile oa thehoa ke Mopapa Pius XI ka selemo sa 1925 'me oa ananeloa ke Kereke e Katholike. Ka mantsoe a mang e se e ka ba lilemo tse 80 joale Makatholike a khobokana 'moho ho keteka Kriste e le Morena. Taba ena e bohlokoa hobane batho ba ile ba bona Morena Molimo e le Morena lilemong tse 3,046 tse fetileng pele ho thehoa mokete ona.

Ba bang ba ka ipotsa hore na ho ile ha etsahala'ng nakong ea lilemo tseo, 'me ka nako eo sechaba se ile sa atamela Samuele hore a se fe morena ea tla se busa, (1 Samuele 8:3,5) joaloka lichaba tse ling tsa bahetene tse li potileng e le hore li be le moetapele nakong ea lintoa. Sena se ile sa koatisa Morena Molimo haholo ka ho tseba lipelo tsa batho ba mo latolang e le Morena oa bona. (1 Samuele 8:7) Ka selemo sa 1043 BC Saule a behoa e le morena oa sechaba sa Morena Molimo.

Toka e ile ea boela ea ajoa hape lilemong tse 78 tse fetileng nakong eo Jesu Kriste, ka ho tlaala Bomolimo (Ba-Kolose 1:19, 2:9) a neng a behoa setulong sa ho ba Morena oa Kereke e Katholike. Kamor'a ho behoa e le Morena potso e ka ba hore na 'Muso oa hae o hokae? Bukeng ea Liketso tsa Baapostola Kriste ea tsohileng bafung o laea barutuo ba hae ho se tlohe Jerusalema ho emela tšepiso ea Ntate (Liketso 1:4). Ho na le sesupo Mangolong a Halalelang hore hona nakong eo Jerusalema e Ncha, 'Muso oa Morena Molimo o ile a theohela lefatšeng.

Batho ba bangata ba emetse ho bona 'Muso oa Morena o bonahalang le hoja Kriste a sa bolela joalo, (Luka 17:20-1) 'Muso oa Morena o ke ke oa bona hobane ke oa moea. Evangeling ea kajeno re utloa mantsoe ana ho tsoa ho Kriste, "Muso oa ka ha se oa lefatše lena." (Joannes 18:36)

Re tlo amohela joang boteng ba Morena kahar'a rona ha joale haeba re ntse re nkehile re lumela ho tla ha 'Muso oa Morena ka tsela e bonahalang? Ka ho etsa joalo re ipalella 'moho le bana ba habo rona ba emetseng tšepiso e sieo. Kriste Morena o teng hara rona kajeno, 'Muso oa Hae o fihlile 'me rona joaloka ba ka hlatsuoeng re amohetse peo ea ea holimo (1 Joannes 3:9) joale mpho ena e re etsa litho tsa 'Muso oa Morena lefatšeng. Ka ho ba libopuo tse ncha re tseba ho khumamela Morena ka moea le 'nete, e leng seo Ntate a se hlokang ho ba mo khumamelang. (Joannes 4:23-4)

Ho ea ka Thuto ea Pele, (Daniele 7:14) 'Muso oa Morena lefatšeng, e leng oa moea, o sa bonoeng ka leihlo la nama ke ona o se nang ho felisoa. Borena ba Kriste ke bo se nang bofelo.

Bekeng ena bohle ha re hlahlobeng hore na litumelo tsa rona ha li hlabane le thuto ea Kriste 'moho le ea Kereke. Re boele re shebe hape hore na li ipapisitse le 'nete ea Bibile, li nka karolo 'Musong oa moea oa Morena ho latela tlhatsuo ea rona. Batho ba bangata b'a kheloso a 'me taba ena e nonyetsa 'Mele oa Kriste, joaloka majoe a phelang ha re tšehetsaneng, re soaeneng mehlare ha re kheloha 'neteng. E le hore bohle ba kopane ho Morena ea mong 'moho le 'nete, tlhatsuo, Kriste, Moea le Kereke e Halalelang e Katholike.

## Bahalaleli har'a Beke

- 25 Pulungoana Alnoth
- 26 Pulungoana Amator
- 27 Pulungoana Valerian
- 28 Pulungoana Hippolytus
- 29 Pulungoana Gulstan
- 30 Pulungoana Maura

# Rugby Lesotho e korile

**Tšeliso Thakholi**

**M**okhatlo oa Lesotho oa Papali ea Rugby (FLR) o phatlalalitsoe ke Mokhatlo oa Lefatše oa Rugby, 'mokeneng oa selemo le selemo oa khohola-koqo o bileng Dublin, Ireland mafelong a beke a tsoa feta, o fihletse lipehelo tsa ho ba setho se feletseng sa mokhatlo kamora ho behoa tekong nako ea lilemo tse peli o ntse o phenngoah mahafi ke Mokhatlo oa Rugby Afrika ho bona hore o fela o fihlela

lipehelo tse hlokalang tsa mokhatlo.

Puisanong le Phala ea FLR, Monghali Morapelili Motaung o boletse hore sena ke katleho e khohlo kaha e sa le e le taba-tabelo ea bona ka lilemo tse ngata haholo ho bona ba fihletse boemo bona. A re sena se bontša khohlo kahare ho papali ea rugby kaha ba atlehile ho fihlela lintlha tse neng li hlokoa ke Mokhatlo oa Lefatše oa Rugby tse kenyeletsang hara tse ling ho netefatsa hore papali ea rugby e teng kahara naha 'me ea bapaloa, ho ba le

lihlopha tse nyenyane Likolong tsa Mathomo le tse Phahameng e le ho otlolla thupa e sa le metsi le ho ba le lihlopha tsa baroetsana le tsa bahlankana.

O itse tse ling tsa lipehelo tse khohlo ka ho fetisisa, tse neng li hlile li hlokoa haholo ke Mokhatlo oa Lefatše oa Rugby ke hore Naha ea Lesotho e bonahale e bapala lipapali tsa machaba tsa rugby le ho ba le liki moo lihlopha li qothisanang le hlokoa.

A re hajoale ba se ba ka iphumana ba kenela litlholisano tsa machaba ho

ipapisitsoe le maemo a tsona, ho ba le tokelo ea ho khetha kapa ho khethoa Mokhatlong oa Lefatše, ho fuoa tšehetso ea lithuso bakeng sa ho holisa le ho ntlafatsa papali ea rugby kahare ho naha le ho fuoa manane-thuto a bokoetlisi.

Potsong ea hore na haele mona e se e le litho tsa mokhatlo o moholo, empa ba e-na le qholotso e khohlo ea mabala ba tliilo etsa joang ha ba se ba lokela ho tla bapala lipapali tsa machaba? O boletse hore ho na le lithuso tseo ba tlang ho li fumana hore ho bonahale

mabala a le teng. "Ho tla ba le khahlametso ka tlatsetso ea bafani." Ke Motaung eo.

Ba bang ba barati le batšehetsi ba papali ea rugby ba thoholelitse tšebetso e tsoileng matsoho ea botsamaisi ba papali ea rugby Naheng ea Lesotho. Ba leb-o-ha ka tsela e khethehileng Kampani ea Econet-Lesotho ka tšehetso e ntseng e fana ka eona ho holisa litalenta tsa bana ba Basotho. Ba ipiletsa ho bahoebi ba bang ho nka mohlala oo o motle oa ho kenya letsoho ka mekhoha e fapakaneng ho holisa papali ena.

## Libini li hloka tšehetso

**Tšeliso Thakholi**

**S**ebini se tsebahalang sa 'mino oa Hip-Hop, Tumelo Seliane ea tsejoang haholo ka lebitso la T-Born, eo e saleng a rata pina ho tloha kholong ea hae o re thahasello e khohlo ke ho bona sechaba sa Basotho se holisa talenta ea bona ea 'mino ka ho ba tšehetsa.

O re ha feela ba ka fumana tšehetso ho tsoa sechabeng sa Basotho, ho na le seo ba ka se fihlelang ka talenta ea bona ea 'mino, e seng ba o utsoe le ho letsa mahala likoloing le malapeng ho se letho leo ba le fumanang. O re ka tšehetso ea sechaba a ka tseba ho fihlela toro ea hae ea hore 'mino oa hae o pharalle le lefatše kaofela. "Ke se ke ntse ke qalile ho sebetsa ka thata ho tsebahatsa 'mino oa ka linaheng tse ling tsa lefatše." A rialo.

O re lerato la pina le ile la hotetsa pelo ea hae, a ba a qetella a ntšitse letlapa le lecha le bitsoang 'The Passion' le tšetseng lipina tse 12 le tukang malakabe kamora ho ntšha letlapa la hae la pele la Sesotho le bitsoang Sotho-man. T-Born o nkile nako e telele a ntse a pheha letlapa lena hore le be boemong bo phahameng boo le tla ananeloa le ho thabeoa ke batho ba bangata ba ratang 'mino oa



Hip-Hop.

Leha letlapa lena la hae le thabeloa le ho ratoa ke batho bohle hoba le fetisa thuto e matla ea bophelo ba letsatsi ka leng, empa hara lona o re o rata pina e

bitsoang 'To the loved one' kaha e tšetse manoni a letlapa lena. Ka kakaretso letlapa lena la hae le lecha le fana ka molaetsa oa tšepo ea bophelo ho sechaba sa Basotho.

A ipiletsa ho bacha ho latela litoro tsa bona, 'me haeba ho na le ba nang le thahasello ea ho bina ba tsoelepele ho hlahisa talenta eo ea bona ea 'mino hobane ka 'mino ba ka phela.

le ho qala ho etsa melaoana le ho hlophisa hore ha ho na le mekete ka ho fapakanana, ho tla ba le mokhoa oa ho bokeletsa litsiane tse tla fuoa sebini se tla be se bina ka nako ea mokete.

A qetella ka ho thoholetsa le ho leboha 'Muso oa Lesotho ka ho ba tšehetsa e le libini

# Ha ke tlas'a khatello-Lefoka



## Tseliso Thakholi

le batšehetsi ba sona, Mazenod ka la 16 Pulungoana monongoaha moo a hlalositse hore o tšoentsoe

haholo ke ho papala ka ho lekana lipapali tse ngata haholo, a e-s'o fumane tlhoho le ha e se e le 'ngoe.

A supa hore se sa mo jeseng litheohelang ke ho hlokomela hore ba papala ka ho lekana leha ba papala habo bona, moo tseliso e neng e le hore ba hape lipapali tsa bona kaha ba e-na le tšehetso e matla ea batlateli ba bona. A bontša hore o hlokometse maemo a na a hloabaetsang, 'me o tliil'o sebetsa kathata ho thusa lipapali tsa hae ho sebetsa ka thata ho hlaba lintlha.

"Tlholo e tla ba teng, 'me ke sebeletsa hore sehlopha se tsebe ho hlaba lintlha, etsoe ke boikarabello ba ka ho bona hore sehlopha se hlaba lintlha le ho hapa lipapali tsa sona." O boletse joalo a bile a tiisa hore taba ena ea ho papala ka ho lekana e tiisa khatello e ngata ho lipapali empa le bona o se a ntse a il'o ba khothatsa hore ba se ke ba ba tlasa khatello. A re leha a sa thabela ho papala ka ho lekana nako e telele, bonyane o ntse a sa lahleheloe ke lipapali "feela se hlokaalang ke ho lok-

isetsa ho bona hore ho tloha hajoale re hapa lipapali tsa rona."

A phethela ka hore morero e ne e le hore ha ba phethela mokhahlelo oa pele oa Liki, ba be ba le ka holimo lokong, empa lintho ha li'a tsamaea hantle. "Ha ke batle ho hang ho ipeha tlasa khatello hoba koloi ena e qhojoa ke 'na, ka hona lintho li ka se tsamae hantle." Ke Lefoka eo.

Swallows e ntse e setse maemong a botšelela ka lipapali tse tšeletseng, ea papala ka ho lekana ho tse hlano, ea lahleheloa ke e 'ngoe 'me e na le lintlha-kholo tse supileng. Haele Qoaling Highlanders e ntse e li hula pele lokong leha e lahlehetsoe ke papali khahlanong le Quthing LMPS. Haele ka mohatleng oa loko Naughty Boys e theohetse maemong a ho qetela kamora ho shapua ke Members ka 1-0, papaling e neng e bapalloa Lebaleng la Swallows ka Moqebelo.

**M**okoetlisi oa Sehlopha sa Bolo ea Maoto sa Swallows, Adoro Lefoka o re h'a ba tle ho ipeha tlasa khatello ea letho, haele mona sehlopha sa Swallows se nkoang e le se seng sa tse khohlo kahara Liki e ka Boroa ea A Division, se ntse se tsoelapele ho papala ka ho lekana le ho lahleheloa ke papali e le 'ngoe ho tloha lipapali tsa Liki li qalile.

Lefoka o buile tsena kamora ho papala ka ho lekana lekhetlo la bohlanono ka tatellano le sehlopha sa 05 United ka ho pitikisa mahe(0-0), kapel'a barati



# Sebapali sa Litšepe sea timela

## Tseliso Thakholi

**P**apali e neng e le lipakeng tsa Sehlopha sa Bolo ea Maoto sa Mokhahlelo oa B Division sa Vultures le Manamela Young Stars, Lebaleng la Manamela, Butha-Buthe ka la 16 Pulungoana monongoaha, e ile ea emisoa ka ho panya

ha ntšhi nakong eo sebapali sa Litšepe se neng se bohile papali ena se lahleheloa ke bophelo kamora ho otloa ke maru, ha tse ling tse peli tsona li ile tsa futsoa ke ona maru.

Ho ea ka litlaleho tsa Mokhatlo oa Bolo oa Setereke sa Butha-Buthe(DiFa Butha-Buthe), mofu o ne a robile monakeli tlasa

sefate sa phaena se hona lebang moo, a bohile papali ena le bo-mphatoa'e ba ba bapallang lihlopha tsa Nqabane le Manamela h'a tla hlalohela ke kotsi ena. Tlaleho e re mofu o ne a chele hona hoo, liphahlo tsa hae li neng li khorametse 'meleng oa hae. Libapali tse peli tse ileng tsa futsoa ke maru li tlalehoa li le maemong

a hloabaetsang a bophelo sepetlele.

DiFA Butha-Buthe e bile ea etsa qeto ea tšohanyetso ea ho chechisa lipapali tsa Liki ea B Division tse neng li lokela ho bapaloa lipakeng tsa Nqabeli Vultures le Lihale le Nare le Manamela Young Stars tse neng li lokela ho papala ka la 17 Pulungoana 2024, ka leba-

ka la kotsi ena e nyarosang. Ho sa le joalo, sehlopha sa Matlama se phatlalalitse ka masoabi a maholo ka lefu la eo e neng e le sethiba-thibane sa eona sa mehlang, Monghali Sheleng Motsamai ea hlokaletseng ka la 14 Pulungoana 2024 kamora ho kula nako e khutšoanyane. Tsa lepatso li tla phatlalatsa hamorao.